

破窯賦

宋。呂蒙正

天有不測風雲，人有旦夕禍福。蜈蚣百足，行不
及蛇；家鷄翼大，飛不如鳥。馬有千里之程，無人
不能自往；人有凌雲之志，非運不能騰達。蛟龍
未遇，潛身於魚蝦之間；君子失時，拱手於小人
之下。天不得時，日月無光；地不得時，草木不長；
水不得時，風浪不平；人不得時，利運不通。昔時
也，余在洛陽，日投僧院，夜宿寒窯。布衣不能遮
其體，淡粥不能充其饑。上人憎，下人厭，皆言余
之賤也。余曰：非我賤也，乃時也。運也，命也。余及
第登科，官至極品，位列三公。有撻百僚之杖，有
斬鄙吝之劍。出則壯士執鞭，入則佳人捧袂。思
衣則有綾羅錦緞，思食則有山珍海味。上人寵，
下人擁，皆仰慕言：余之貴也。余曰：非我貴也，此
乃時也。運也，命也。蓋人生在世，富貴不能屈，貧
賤不能移，此乃天地循環之理，終而復始者也。

歲次丙申年孟秋 蔡榮林



書